

2 Timoteo

¹ Paulo muutung'wa nuang'wa Yesu Kilisto anga Itunda nuloilwe, uulukulu anga ilago nilaupanga nuukole mukati ang'wa Yesu Kilisto.

² Kung'wa Timoteo ung'wana numuloilwe: Nekanda, nuukende nuupolo kupuma kung'wi Tunda Tata nu Yesu Kilisto Mkulu witu.

³ Numusongeeye Itunda, uyu nikumitumela kisigo niza anga uu naeatendile iatata ane, ange nkimbuke ninkole mumalompi ane. Utiku nu ⁴ mung'wi nkete nsula akuuona, inge gwa wizule uulowa. Nulukimbukile uliholi lako.

⁵ Aenekeze kimbushigwa uuhueli wako nueli, apo naeng'wandyo aikie kung'wa nyukulu nuako u Loisi nuia nuako u Yunisi. Hange ngila itai kina uhueli nuanso wikie mukati ako gwa. ⁶ Iye inge nsoko nakukimbusha kukiusha ekipegwa kang'wi Tunda nikikole mukati ako kunzila akuekiiligwa imekono nane. ⁷ Kunsoko Itunda singukupee inkolo nawoa, inge angulu nuulowa nikulyo. ⁸ Kuite ulekekuonela iminyala nua Mukulu witu, sunga ganuwu nuane unene Paulo mutungwa nuakwe. Inge utule palung'wi mulwago kunsoko autananti uu lukulu angauhumi wang'wi Tunda.

⁹ Inge Itunda aukugunile nukuitanga uitangi nuutakatifu. Shanga aewitumile itensoko amelimo itu inge angaukende nuunonelya wakwe nuanso. Aukupee imakani aya mung'wa Kilisto Yesu aeakili imatungo kanza. ¹⁰ Kuite

itungo ele uguni nuang'wi Tunda wakunukulwe kiza kumuguni witu u Yesu Kilisto. Ukilisto wikamipelwe insha nukuleta uupanga nisiga ukupela kuwelu nuankani niza. ¹¹ Kunsoko yiyi nikabagulwa kulula nimutananti, mutumi hange nemumanyisi. ¹² Kunsoko yiyi kaga gwa, kuite singa minyala soko numulengile ninamukuela. Nkete itai kina nuanso ukumile kukigoza iki nenakiika kung'waakwe sunga uluhiku lulo. ¹³ Ukimbuke umufano nualukani nulauhueli naewigule kupuma kung'waane, palung'wi nuuhueli nuulowa nuukole mukati ang'wa Yesu Kilisto. ¹⁴ Magoze imakani nimaza naeukupee Itunda kukiila ung'waung'welu nuikie mukali itu. ¹⁵ Ulengile kina, neikie mu Asia aeanalekile' Mumbi ele akole ia Figelo nia Hemogene. ¹⁶ Umukulu walisamile ito lang'wa Onesiforo kunsoko nkua yedu aundoeye hangi shangaunionee iminyala ekitungo kane. ¹⁷ Kuleka gwa iti, naukole ku Roma aundumile kungulu hange wikandija. ¹⁸ Itunda nuamujalie kumupa ukende kupuma kung'waakwe uluhiku nutanso. Anga naunzaiye naenkole ku Efeso uwe ulengile iza.

2

¹ Kuite uewe ng'waane, upegwe ngulu muukende nuukole mung'wa Yesu Kilisto. ² Nimakani naewigulye kung'waane muihengi naeiidu, umaikie kuantu niahueli niahumile kumanyisa niauyagaa. ³ Tula palung'wi nunene mulwago, anga mulindi numuza nuang'wa Yesu Kilisto. ⁴ Kutile umulindi

nuituma imatungo yayo yayoo wezeukete
nimilimo nimingiza nalikalo nulemunu
inge kina wamuloelye umukulu wakwe.
⁵ Hange ang'wi muntu ukishinda liaza, singa
ukupegwa ingala anga waleke kutyata ulengaso.
⁶ Kusamilye kina umukulima nukete ebidii
watule wang'wandyo kugaulwa imazao
akwe. ⁷ Tapazali nikinikukilinga, kundogoilyo
Umukulu ukupa kulenga mumakani ehi.
⁸ Mukimbuke u Yesu Kilisto, kupuma ukiugwa
nuang'wa Daudi, naeuiukile kupuma muashi.
Ite anga ulukani lane nukutananti inkani
ninza, ⁹ inge kunsoko nanso kagigwa sunga
ukutungwa iminyololo anga nimugazi. Kuite
ulukani lang'wi Tunda kuminyololo. ¹⁰ Kuite
gwa, nigigimieye imakani ehi kunsoko aawa
ni Tunda auasague, ingegwa nienso gaa aliye
uuguni nuukole mung'wa Yesu Kilisto palung'wi
nuukulu nuakali. ¹¹ Intambu iye akuhuelika:
Angeze aekukule palung'wi nung'wenso,
kuikie nung'wenso goa. ¹² Anga kigigimilye,
kuutemya palung'wi nung'wenso gaa anga
kumuhile nuanso, nung'wenso gaa ukuhita
usese. ¹³ Ang'wi singa kuutula kiahueli, nuanso
ukusaga kutula muhueli, indogoelyo shuhumile
nuanso kihita.” ¹⁴ Longoleka kuakimbisha
imakani aya. Alange ntongeela ang'wi Tunda
aleke kikunguma minkani. Kunsoko kutile anga
nsailo mukani ele. Kigeela kueli ukole ubepi
kuawa niakutegeelya. ¹⁵ Tula nikinyangulu
kigeeleka kina ugombigwe kuang'wi Tunda anga
mituma mulimo numugila insoko nakumelwa.

Litumele ulukani latai mukulukuulu. ¹⁶ Iheje mumwanzo nakiukumbigulu, nanso ongeelya nukukila uubi. ¹⁷ Imyanzo ao ikisapalila anga inkomele shanga ipola niakole mung'wanso inge Himenayo nu Fileto. ¹⁸ Awa antu niauiye itai. Ilunga kina uiuki wakonda kigela. Akupiula uhueli nuaantu ang'wi. ¹⁹ Ata uu, ikitako nikipumu nikang'wi Tunda kilungile, nuukete uandeki uwu, Umukulu ualengile awa niakwe, hange kila nueleteza ulina lamukulu waleke uubi.” ²⁰ Mito nilakigole, singa kina ikole useme niazhabu neshaba udu. Inge gwa ikole niiseme niamakota nipihe. Niing'wi yao kunsoko akitumila mikulyo hangr ung'wi yao singa yitumilwa mumakulyo. ²¹ Angeze umuntu ukioja ung'wenso kupuma muitumelwi nesinga wikulyo, nuanso keseme nekikete ikulyo. Uekilwe ikulu, ukete nsailo kumukulu, hange unoneigwa kukila mulemo nuuza. ²² Imanke insula niauhumba. Umetyate itai uhueli ulowa nuupolo palung'wi nawa niimitanga Umukulu kumoyo nuuza. ²³ Kuite uhite uupungu nimakolyo ao naupuuzi. Kuite ulengile kina ituga witei. ²⁴ Umitumi nua Mukulu shayemunonee kilea, kuleka aya yemunonee kulula mupolo kuantu ehi, numanyile kumanyisa, nukigigimiilya. ²⁵ Inge wasinje waamanyise kuupolo awaniimugilya. Itai Itunda wahume kuapa kuungama anga amilinga itai. ²⁶ Ahume kulija uulengi hange nukiheja mumuntengo nuamulugu, nae akule amateka nung'wenso kunsoko aulowe wakwe.

3

¹ Kuite ulenge ele: Mumahiku nampelo yukutula matungo makaku. ² Kunsoko iantu akutula iloilwe ienso, alowa mpia, neikulya neakete uwiloli, neakete uwing'eng'i, shanaakuiye ialeli ao niagila anga ikumbi hange ashapu. ³ Niagila ulowa nuaupuumo, nesaatakile kieke nuupolo niauya, akinyeli, asongeeli, neshahumile kigilya, neakete epujo, nesaatakile nimaza. ⁴ Ikatula nukuhitana, elogoha, neiloilwe ienso hange alowa usambo kukila kumulowa Itunda. ⁵ Kukunzi akutula anga ang'wi Tunda, kuite akumihita engulu akwe. Iheje muantu nianso. ⁶ Kunsoko ang'wi ao inge agoha neingila mumato naantu nukupepeelya asungu niapungu. Awa asungu neizuwe nimilandu hange niitongeelwa ninsula niakela kela iaina. ⁷ Iasungu awaite imanyisa imahiku ehi, kuite kwee shaakupiki-ila uulengi nuatai. ⁸ Anga uu nua Yane nu Yambre aeemikile kumuhita u Musa. Kunsoko eye amanyisi awa niauteele imika kumuhita itai. Antu niabipile mumasigo ao, shagombekile kutula nuuhueli. ⁹ Kuite shaakulongoleka nikuli. Kunsoko uupungu wao ukuikwa muweguse kuantu ehi, anga naewile nuaantu ao. ¹⁰ Kuite uewe uutyatile uumanyisa wane, mulugendo lane, isigo lane, uhueli wane, wigigimeeli wane, ulowa wane nuuhumi wane, ¹¹ Iwago, uuwai naempaatile uko ku Antiokia, Ikonja nuku Listra. Aenigigimiiye ulwago. Umukulu aungunile mung'wanso nanso ehi. ¹² Ehi nialoilwe kieke mulikalo lakumukulya Itunda mung'wa Yesu Kilisto akagigwa. ¹³ Iantu niabi

neikongelana akutula abi kukila. Akuakongela iauya. Nienso goa akongewe. ¹⁴ Kuite uewe, saga munkani naewimanyisilye nukuikuela mutai. Kunsoko ulengile wimanyisilye kung'wa nyenyu. ¹⁵ Ulengile kina kupuma uung'anya wako aulengile umaandeko nimatakatifu. Aya akumile kuukulya kunsoko auguni kunsoko auhueli mung'wa Yesu Kilisto. ¹⁶ Kela iandeko liekiwe mekupo nang'wi Tunda. Lenonee kumanyisa umanyisi nuansailo, kupepeelya, kuzipiilya ulutumo, hange nukumanyisilya mutai. ¹⁷ Iye kina umuntu nuang'wi watule ukondile, wezeupegilwe uhumi wehi kunsoko akituma kela umulemo nuuza

4

¹ Kuupa ilago ile nilikete ulito ntongeela ang'wi Tunda nu Yesu Kilisto, nuezize alamura niapanga nawe niakule, hange kunsoko akukunukulwa kung'wake nuutemi wakwe. ² Tanantya ulukani. Utule ukole muukondi kumatungo e nanonee nayanisinga anonee. Aile iantu imilandu ao, kenela, kazila, kuugimya wehi nukumanyisa. ³ Kundogoilyo imatungo iantu niika hita umanyisigwa nuatai. Kuleka ite, ekidumilya amanyisi niakumanyisa anga ensula ao. Kunzila eye iakutwi ao akutule asukasukilwe. ⁴ Akuleka kutegelya umanyisigwa nuatai, nukupilukila imahumo. ⁵ Kuite uewe utule umuhueli mumakani aya ehi, igigimielye mumakaku, itume umulemo nuautananti, uigeelye uitumi nuako. ⁶ Kundogoilyo unene nakonda kukegenwa. Imatungo nakuhega

kung'waane ahugeela. ⁷ Nahumane etai, ulugendo nalumala, uhueli nuulindile. ⁸ Ingala nатаi eikilwe kunsoko ane, numukulu, nuilamule itai, uzize mpa uluhiku nulanso. Hange singaunene du. Inge ehi nialindie kunsula kigela kung'waakwe. ⁹ Witahidi ukaje kiza kung'waane. ¹⁰ Kunsoko u Dema wandeka, uuloilwe uunkumbigulu nuilugele hange wendile ku Thesalonike, u Kreseni wikenda ku Galatia, nu Tito wikenda ku Dalmatia. ¹¹ U Luka du nukole palung'wi nunene. Umukole u Maliko wize kung'waane kunsoko nuanso wamihumi kung'waane muwitumi. ¹² Namulagiilya u Tikiko ku Efeso. ¹³ Izoha ilo naelilekile Troa ku Karpo, nuzile ulelete, palung'wi nimbugu iza kukila izinia ndeli. ¹⁴ U Alekizanda muzipya yuma autendee nimabi edu. Umukulu wikamupa ikinyamulimo anga intendo yakwe. ¹⁵ Nuewe gaa uhuguke nung'wensо, inge auigi kukila inkani yitu. ¹⁶ Muukueli wane nua ng'wandyo, kutile anga muntu wehi naewimikile palung'wi nunee, kuleka ite kila umuntu wikandeka. Itunda waleke kumuailya igazo. ¹⁷ Kuite Umukulu wikimeke palung'wi nunene, wikampangulu nsoko kina kukiela kung'waane, lukani lutambulwe kuutimeeli nianyakilungu apegwe kija. Aengunilwe mumilomo nuuhimba. ¹⁸ Umukulu ukuniheja muntendo yehi numbi nukunguna kunsoko autemi wakwe nuakilunde. Ukulu ulule ukole kung'waakwe ikale nikale Huela. ¹⁹ Mulamushe u Priska, Akila mito lang'wa Onesiforo. ²⁰ U Erasto ausagile uko Kukorinto, kuite u Trifimo ainumulekile ku

Mileto akeze muilwae. ²¹ Kaya wize kabla nitungo ku mpepo, u Eubulo ukuulamushe, ga nu Pude, Lino, Claudia nialina ehi. ²² Ukende utule newe. Ituma watule nenkolo ako.

Isanzu Bible

The New Testament in the Isanzu language of Tanzania

copyright © 2020 Door 43 International Mission Community

Language: Kiisanzu (Isanzu)

Translation by: Door 43 International Mission Community

Contributor: Bundala Isanzu, MCH Bundala, Mlilo Isanzu, Rev. Bundala Samwel

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-07-31

PDF generated using Haiola and XeLaTeX on 21 Feb 2024 from source files dated 31 Aug 2023

b95c8559-38aa-5982-90b8-16a1be58209c